

Na osnovu člana 35., stav 3. i člana 51. Stav 3. Zakona o zaštiti prirode ("Službene novine Federacije BiH, broj 33/03), federalna ministrica okoliša i turizma donosi

PRAVILNIK

O NOVIM MJERAMA ZA ISTRAŽIVANJE ILI OČUVANJE KAKO BI SE SPRIJEČIO ZNAČAJAN NEGATIVAN UTICAJ NA ŽIVOTINJSKE VRSTE NAMJERNIM HVATANJEM ILI UBIJANJEM

Član 1.

Ovim pravilnikom utvrđuju se nove mjere za istraživanje ili očuvanje životinjskih vrsta kako bi se spriječio značajan negativan uticaj na vrste namjernim hvatanjem ili ubijanjem vrsta.

Član 2.

Pravilnikom se uređuje način prikupljanja i analiziranja podataka o zaštićenim životinjama sa Crvene liste. Federalno ministarstvo okoliša i turizma (u daljem tekstu Ministarstvo) prikuplja i analizira podatke o zaštićenim životinjama sa Crvene liste i prikuplja i analizira podatke pravnih osoba koje kroz svoje aktivnosti mogu negativno uticati na životinjske vrste sa Crvene liste, a sve u cilju sprječavanja negativnog uticaja na životinjske vrste namjernim hvatanjem ili ubijanjem.

Pravne osobe iz stava 1. ovog člana su: lovačka društva, ribolovna društva, zoološki vrtovi, naučne i naučnoistraživačke institucije, nevladine organizacije i druge pravne osobe koje se bave biotaksonomskim i idioekološkim istraživanjima, odnosno sva pravna lica, kao i njihova udruženja koja mogu biti nosioci prava namjernog hvatanja ili ubijanja zaštićenih životinja, te prikupljanja i analiziranja podataka o zaštićenim životinjama sa Crvene liste.

Ministarstvo se obavezuje da analizira podatke pravnih osoba iz stava 2. ovog člana. Stručni izvršilac Ministarstva za izvršavanje ovih poslova treba biti specijalista iz oblasti animalne ekologije.

Član 3.

Ministarstvo prikuplja, obrađuje i objedinjuje prikupljene podatke o zaštićenim životinjskim vrstama, te na osnovu njih predlaže pokretanje istraživanja radi sagledavanja trenutnog stanja određenih populacija dodatno ugroženih taksona (varijeteta, podvrsta i vrsta).

Ministarstvo ima obavezu da odredi stepen ugroženosti za svaku pojedinu populaciju životinjskih vrsta na području Federacije Bosne i Hercegovine, i to prema sistemu kategorizacije Međunarodne organizacije za zaštitu prirode (IUCN), te je dužna na osnovu dobijenih rezultata predlagati dopune Crvenih listi, odnosno obznaniti povećanje nivoa ugroženosti vrsta već evidentiranih na listama.

Dostupnost prikupljenim podacima o negativnom uticaju na opstanak životinjskih vrsta njihovim namjernim hvatanjem ili ubijanjem uređuje se prema Zakonu o slobodi pristupa informacijama u Federaciji Bosne i Hercegovine ("Službene novine Federacije BiH", broj 32/01).

Član 4.

Obaveza prikupljanja podataka od strane Ministarstva podrazumjeva uspostavu baze podataka za vrste sa Crvene liste životinja uz primjenu savremenih taksonomskih principa, a sadržavat će opis staništa vrsta sa Crvene liste životinja i mapu distribucije vrsta sa Crvene liste životinja.

Član 5.

Sve privredne aktivnosti koje se odvijaju na staništima vrsta sa Crvene liste životinja podrazumjevaju saglasnost Ministarstva.

Član 6.

Naučna istraživanja zaštićenih životinja odobrava Ministarstvo.

Istraživanje zaštićenih životinja može vršiti pravna osoba iz člana 2. stav 2. ovog pravilnika koja raspolaže specijalistom za skupinu koja se istražuje.

O rezultatima naučnog istraživanja pravna osoba koja je obavila naučno istraživanje dužna je u roku od 60 dana po završetku istraživanja izvijestiti Ministarstvo.

Član 7.

Zabranjena su naučna istraživanja koja bi ugrožavala izvornost prirode ili bi dovela do promjena u staništu(ima) i izgledu krajolika ili znatnog uništavanja, rastjerivanja, uznemiravanja, hvatanja, ozljeđivanja i ubijanja životinjskih vrsta na istraživanom području.

Član 8.

Ministarstvo će prekinuti naučno istraživanje u slučaju da se istraživači ne pridržavaju uvjeta iz odobrenja o načinu i vremenu istraživanja, te ako istraživači svojim radnjama nanesu štetu izvornosti prirode.

Član 9.

Materijal prikupljen tokom istraživanja predstavlja imovinu FBiH i kao takav se pohranjuje u Prirodnjačko odjeljenje Zemaljskog muzeja BiH u Sarajevu ili u neki od postojećih zavičajnih muzeja.

Nositelj istraživanja je dužan nakon obrade materijala isti uredno označiti prema muzeološkim pravilima i sačiniti njegov inventarski list, i to u obimu od najmanje 80% sakupljenog materijala.

Izuzetno od stava 1. ovog člana Nositelj istraživanja može zadržati veću količinu sakupljenog materijala (do 80%) ako je koristio vlastita sredstva za naučno istraživanje. Izuzetno od st. 1., 2. i 3. ovog člana nositelj istraživanja može zadržati cjelokupan materijal ako ponuđeni muzeji odbiju prihvatiti materijal iz bilo kog razloga.

Član 10.

Ovaj pravilnik stupa na snagu osam dana od dana objave u "Službenim novinama Federacije BiH".

Broj:

Federalna ministrica

Sarajevo,

Katica Čerkez